

И быдӧнкӧд сёрнитны, юасьны, висътасьны



Архангельскын ве-лӧдчӧм бӧрын Елена Сёмина эз мун бӧр гортас – Плесецк карӧ, а локтис Кӧрткерӧсӧ. Ӧд тані мамыслӧн чужа-ніныс. Да и ачыс ӧд коркӧ тані жӧ чужліс. Кыскӧмӧн кыскис сійӧс тайӧ сиктыс, кӧть эськӧ нэмӧ оліс карын.

И со уна во нин олӧ-вылӧ Кӧрткерӧсын. Первой кадсӧ зілис пошта вылын, но небӧг дорӧ муслуныс «вайӧдіс» сійӧс татчӧс библиотекаӧ.

–Миян дорӧ волӧ уна да быдсикас йӧз. И быдӧнкӧд Лена аддзӧ ӧти кыв, – висъталӧ аслас уджалысь йылысь Кӧрткерӧсса ЦБС-ӧн веськӧдлысь Светлана Челпанова. – Торйӧн кокныыда сибалӧ том йӧз дорӧ. Та вӧсна и гырысь класса велӧдчысьяскӧд буретш сійӧ зільӧ.

Ӧткымынӧн чайтӧны, мый библиотекаад уджыс – сэтчӧ волысьлы сӧмын книга-журнал сеталӧм, но тадзи чайтӧны найӧ, кодъяс татчӧ оз и пыравлыны. Челядькӧд да верстьӧкӧд уна лыда аддзысьлӧм, выставка, нималана йӧзкӧд тӧдмасьӧм, сикт-грездӧ лыддысьсысьяс дорӧ ветлӧм... Тайӧ сӧмын тыдалана ичӧтик юкӧныс. А тыдавтӧмсӧ колӧ артыштны да босътны тӧд вылӧ, кымынӧн волісны, мый радейтӧны лыддыны, кутшӧм выль книга корӧны...

И быдӧнкӧд сёрнитны, юасьны, висътасьны.

Тадзи и уджалӧ муса лӧсьыд ань Елена Сёмина Кӧрткерӧсса библиотекаын.

Чолӧмалам сійӧс да сылысь став ёртсӧ налӧн профессиональнӧй празникӧн! Тіян уджныд колӧ йӧзыслы и водзӧ кутас ковны.